

# Tranter Rumantschs be rumantsch?

DA MARTIN GABRIEL, SECRETARI GENERAL  
DA LA LIA RUMANTSCHA

■ **Gia il 19avel tschientaner è il prinzipoet rumantsch Giachen Hasper Muoth, oriund da Breil, s'occupa da l'avegnir dal rumantsch. En la poesia «Al pievel romontsch» exprima el ses gronds quitads pertutgant il linguatg ed admonescha in e scadin da s'engaschar per quest prezios stgazi.** Er il scrivent ladin Peider Lansel ha mo paucs decennis pli tard cum battì vehementamain per ina renaschientscha dal rumantsch e cunter tendenzas irredentisticas da l'Italia che avevan per mira da degradar il rumantsch ad in dialect da la Lombardia. Tranter Rumantschs be rumantsch – quai è stà il motto da Lansel ch'ins legia anc oz sin la cuverta dal «Chalender Ladin».

Ed oz? Tgi stat anc si e defenda? Cunfins da la Rumantschia – datti anc quels? Nus n'essan betg vegnids a Berna per ans lamentar e per render omaggi al passà. Nus vulain lavurar ord atgna forza vi da nossas finamiras. Las suandantas tesas èn pretensiuns envers la confederaziun, il chantun e la comunitad e cumpiglian er il champ da lavur da la Lia Rumantscha a partir da damaun:

## Tesa 1: Territori da tschep

En il territori da tschep, en vitg e val, sto la Lia Rumantscha far sforzs pli gronds per il rumantsch. Las fusiuns da vischnancas e la refurma dal territori èn pli u main terminadas, il temp da midadas è passà. Uss è il temp da guar-

dar che la lingua restia viva en las valadas rumantschas, che la cultura rumantscha vegnia promovida. En las novas vischnancas èsi impurtant da guardar ch'ills uffants emprendian vivnavant rumantsch en scola, era sche quellas vischnancas èn ussa bilinguas. La Lia Rumantscha sto urgentamain augmentar la promoziun regiunala en Surselva, en il Grischun central ed en l'Engiadina.

## Tesa 2: Chantun Grischun

Il chantun Grischun ha ina rolla centrala en la promoziun e protecciun dal rumantsch e dal talian. Dal chantun Grischun pretendain nus che la protecciun da las linguas minoritaras survegna ina pli auta prioritad. La Lia Rumantscha procura che las decisiums dal chantun vegnian realisadas. Il chantun ha il pensum da guardar che la lescha da linguas vegnia resguardada e suandada strictamain – nus vulain ina trilinguitad activa e vivida da vart da las autoritads e betg ina trilinguitad be sin dumonda. La Lia Rumantscha sto en il futur s'engaschar per dapli acceptanza per las linguas minoritaras tar la maioritad tudestga.

## Tesa 3: Diaspora

Ina gronda midada per ils proxims onns è cumpigliada en il fatg ch'il rumantsch è anc adina da chattar a Mutschnengia, Mulegns e Martina, dasperas dentant er a Turitg, Kleinbasel ed en la Lorraine. Il rumantsch è daventà ina lingua pli e pli svizra. Il rumantsch è oz ina lingua che vegn discurrida independentamain da ses ter-

ritori oriund. La Lia Rumantscha basogna urgentamain ulteriurs meds finanzials da la confederaziun per crear purschidas che animeschan era Rumantschas e Rumantschs en l'uschenumnada diaspora da tgrirar e dar vivnavant lur lingua.

## Tesa 4: Confederaziun

Avischinaziun! Nus vulain che la confederaziun surpiglia dapli responsabladad per ina Svizra quadrilingua – la convivenza da las quatter linguas è in punct debel. La Lia Rumantscha sa guida cun metter en vigur las mesiras. Las quatter linguas naziunalas n'èn betg be

ina prosa per plets da dumengias. Cun ina politica pli activa en favur da la coesiun Svizra e cun la chapientscha per ils giavischs e las spetgas en las differentas regiuns linguisticas po la confederaziun evitar discordia. La confederaziun – cun il sustegniment da la Lia Rumantscha – ha era da surpigliar ina pli gronda responsabladad per il rumantsch en la diaspora.

## Tesa 5: Comunicaziun

Ina lingua po be survivor cun il pled en scrit ed en tun. Las medias èn perquai ina part centrala da la vitalitad d'ina lingua, ellas procuran mintga di per la pussaivladad d'udir e da leger la lingua. Perquai è noss unic giavisch dad oz per la populaziun svizra: in na a l'iniziativa No-Billag. Per che nus hajan vivnavant in radio ed ina television rumantscha nua che nus udin noss chors a chantar, avain las novitads da las valadas e pudain mantegnair ina colliaziun cun nossa lingua e cultura, tuttina nua che nus Rumantschas e Rumantschs essan sparpagliads en l'istorgia da quest mund.

Nus avain skizzà las sfidas che ans spetgan l'81avel onn suenter ch'il rumantsch è daventà linguatg naziunal e las pussaivladads e necessitads da svilup per nossa lingua. Nus essan pronti d'ans engaschar per ella e nus sperain che la maioritad saja pronta da sustegnair nus en quest intent. Gist uschia sco l'onn 1938, cura ch'ina maioritad da 91,6 pertschient ha votà en favur dal rumantsch. En quel senn in grond grazia fitg per il sustegn per nossa lingua e nossa cultura.



Martin Gabriel.

MAD